

25/04/2002

Pertabalan Seri Paduka penuh istiadat

Nadzim Ahmad Jamalludin

ISTIADAT pertabalan Tuanku Syed Sirajuddin Syed Putra Jamalullail sebagai Yang di-Pertuan Agong ke-12 di Istana Negara hari ini dimulakan dengan keberangkatan masuk Seri Paduka dan Raja Permaisuri Agong, Tuanku Fauziah Tengku Abdul Rashid menuju ke singgahsana di Balai Rong Seri sambil diiringi tiupan nafiri dan paluan nobat lagu Raja Berangkat.

Keberangkatan Yang di-Pertuan Agong dan Raja Permaisuri Agong ke Balai Rong Seri didahului Datuk Paduka Maharaja Lela, Datuk Zubir Ali dan panglima yang membawa Cogan Alam dan Cogan Agama, diiringi juruiring baginda serta panglima yang membawa alat kebesaran diraja.

Sejurus baginda berdua bersemayam di Singgahsana untuk istiadat pertabalan, paluan nobat berhenti. Zubir kemudian menghadap dan memohon perkenan Yang di-Pertuan Agong bagi memulakan istiadat untuk membawa masuk al-Quran dan alat kebesaran istiadat pertabalan ke Balai Rong Seri.

Paluan nobat dengan lagu Menjunjung Duli akan dimainkan apabila Datuk Paduka Maharaja Lela masuk semula ke Balai Rong Seri bersama-sama Datuk Penghulu Istiadat dan Al-Fadhil Pegawai Agama Istana serta panglima yang membawa al-Quran, keris kerajaan, surat perisytiharan serta warkah ikrar.

Datuk Paduka Maharaja Lela kemudian sekali lagi memohon perkenan Yang di-Pertuan Agong untuk mempersembahkan al-Quran. Yang di-Pertuan Agong mencium al-Quran sebelum meletakkannya di atas meja.

Istiadat pertabalan diteruskan dengan Datuk Paduka Maharaja Lela menghadap dan memohon perkenan Yang di-Pertuan Agong untuk membawa menghadap Perdana Menteri, Datuk Seri Dr Mahathir Mohamad bagi membacakan surat Perisytiharan Pertabalan.

Selesai Dr Mahathir membaca perisytiharan itu, Datuk Penghulu Istiadat mengambil pula pahar berisi keris kerajaan dan mengiringi Datuk Paduka Maharaja Lela menghadap Yang di-Pertuan Agong.

Datuk Paduka Maharaja Lela kemudian berlutut sambil mempersembahkan keris kerajaan kepada Yang di-Pertuan Agong.

Yang di-Pertuan Agong yang menerima keris kerajaan kemudian menghunus, mengucup dan menyarungkan kembali keris kerajaan sebelum meletakkannya di meja sisi.

Selesai upacara itu, Datuk Paduka Maharaja Lela sekali lagi akan menghadap Yang di-Pertuan Agong untuk menyembahkan warkah ikrar. Ketika Yang di-Pertuan Agong melafazkan ikrar, semua tetamu dikehendaki berdiri.

Sempurna saja ikrar dilafazkan, paluan nobat lagu Raja Bertabal dimainkan. Serentak itu, Datuk Paduka Maharaja Lela melaungkan Daulat Tuanku sebanyak tiga kali sambil diikuti tetamu yang hadir diiringi tiupan nafiri.

Pada masa yang sama, tembakan meriam 21 das dilepaskan dan lagu Negaraku diperdengarkan.

Sebaik selesai lagu Negaraku, Perdana Menteri menyampaikan ucapan diikuti titah Yang di-Pertuan Agong dan bacaan doa.

Selesai bacaan doa, Datuk Paduka Maharaja Lela menyambut semula al-Quran daripada Yang di-Pertuan Agong dan memaklumkan istiadat pertabalan selamat disempurnakan.

Tiupan nafiri dan paluan nobat lagu Raja Berangkat dimainkan apabila Yang di-Pertuan Agong dan Raja Permaisuri Agong berangkat meninggalkan Balai Rong Seri.

Istiadat pertabalan Yang di-Pertuan Agong ke-12 disaksikan Putera Mahkota Brunei yang mewakili Sultan Brunei; Raja-Raja Melayu; Yang di-

Pertuan Besar Negeri Sembilan; Yang Dipertua; Pemangku Raja Perlis dan
Tengku Mahkota Johor. Menteri Kabinet dan wakil negara asing turut hadir.
(END)